

दिनांक 14.11.2025

समय: 18.45 बजे

आकाशवाणी जयपुर-अजमेर

समाचार

- अंता विधानसभा सीट रा उपचुनाव मांय कांग्रेस रा उम्मीदवार प्रमोद जैन भाया जीत्या-करीबी उम्मीदवार भाजपा रा मोरपाल सुमन ने 15 हजार 612 वोटों ऊं हराया ।
- राजस्थान हाईकोर्ट राज्य सरकार ने पंचायत अर नगर निकाय चुनाव आवता साल 15 अप्रैल ताई हर हाल मांय करावण रा हुकम दीना ।
- भगवान बिरसा मुंडा री जयंती रे मौके काल राष्ट्रीय जनजातीय गौरव दिवस मनायो जावेला- डूंगरपुर मांय राख्या जावण वाळा राज्य स्तर रा जळसा मांय मुख्यमंत्री भजनलाल शर्मा ई शामिल व्हेला ।

अर

- देश रा पहला प्रधानमंत्री पंडित जवाहर लाल नेहरू री जयंती आज बाल दिवस रा रूप मांय मनायी ज्यी ।

000

अंता विधानसभा सीट माथे व्ह्यो उपचुनाव कांग्रेस रा उम्मीदवार प्रमोद जैन भाया जीत लीनो है । वे नज़दीकी उम्मीदवार भारतीय जनता पार्टी रा मोरपाल सुमन ने 15 हजार 612 वोटों ऊं हराया । कांग्रेस रा भाया ने 69 हजार 571 जद के भाजपा रा मोरपाल सुमन ने 53 हजार 959 वोट मिल्या । तीजी ठौड़ माथे रह्या निर्दलीय उम्मीदवार नरेश मीणा ने 53 हजार 800 वोट मिल्या । नतीजा रा ऐलाण पाछे प्रदेश कांग्रेस अध्यक्ष गोविंद सिंह डोटासरा प्रमोद जैन भाया ने बधाई देता थकां इण ने "विश्वास अर विकास री जीत" बतायो ।

.....
नतीजां माथे भाजपा रा प्रदेश अध्यक्ष मदन राठौड़ कह्यो के पार्टी जनता रा हुकम रो मान करे है ।

.....
निर्दलीय उम्मीदवार नरेश मीणा हार पाछे कह्यो के वे जनता रा प्रेम अर आशीर्वाद ने नमन करे है । ध्यानजोग है के अंता विधानसभा सीट माथे उपचुनाव सारू 11 नवम्बर ने वोट पड़्या हा ।

000

बिहार विधानसभा चुनाव मांय राष्ट्रीय जनतांत्रिक गठबंधन-एनडीए भारी जीत हासिल करण ओड़ी बढ़ रह्यो है । हाल ताई ऐलाण करी ज्यो 92 नतीजां मांय ऊं 80 सीटां एनडीए ने जदके आठ सीटां न्यारी-न्यारी पार्टियां रा महागठबंधन ने मिली है । चार सीटां दूजा उम्मीदवार जीती है । महागठबंधन रा उम्मीदवार 33 सीटां माथे आगे चाल रह्या है । राष्ट्रीय जनता दल 25, कांग्रेस पांच, सीपीआई माले-लेनिन दो अर सीपीआईएम एक सीट माथे आगे चाल रही है । पांच सीटां माथे एआईएमआईएम अर एक सीट माथे बहुजन समाज पार्टी आगे चाल रही है ।

000

राजस्थान हाईकोर्ट राज्य सरकार ने 15 अप्रैल 2026 ताई हर हाल मांय पंचायत अर नगर निकाय चुनाव करावण रा हुकम दीना है । अदालत सरकार ने ई साल 31 दिसंबर ताई सगळी पंचायतां अर निकायां मांय परिसीमन रो काम पूरो करण रा ई हुकम दीना । कार्यवाहक मुख्य न्यायाधीश संजीव प्रकाश शर्मा री पीठ जनहित याचिकावां समेत न्यारी-न्यारी अर्जियां माथे आज अ हुकम दीना ।

ध्यानजोग है के प्रदेश मांय करीब 6 हजार 759 पंचायतां अर 55 नगरपालिकावां री कामकाज री मियाद पैली ई पूरी व्हे गयी है, पण हाल ताई चुणाव नी करावण ऊं जुड़ी केई जनहित याचिकावां अदालत मांय दायर करीजी ही।

000

लोकसभा अध्यक्ष ओम बिरला आज कोटा मांय **“आपकी पूंजी आपका अधिकार”** योजना री सरूआत कीनी। ई मौके वे कह्यो के ई योजना रो खास मकसद बेनामी माली संपत्ति रो मालिकाना हक वां रा मालिकां ने देवणो अर ई बारा मांय जाग जगावणो है। वे कह्यो के ई योजना रे मार्फत बैंकां मांय पड़ी बिना पहचान वाळी रकम वां रा असली हकदार ने मिल सकेला।

संसदीय कार्य मंत्री जोगाराम पटेल ई आज जोधपुर मांय **‘आपकी पूंजी, आपका अधिकार’** अभियान रा जिला स्तर रा शिविर रो उद्घाटन कीनो। ई मौके वे कह्यो के ई अभियान रो मकसद जनता ने दावो नी करीजी जमा रकम, बीमा री रकम, डिविडेंड, शेयर, म्यूचुअल फंड बैलेंस अर पेंशन देनदारियां री ठा करण अर वां माथे दावो करण सारू सक्षम बणावणो है। संसदीय कार्य मंत्री कह्यो के हर एक जणा ताई बैंकिंग सेवावां री पहुंच तैय करण सारू केन्द्र सरकार लगातार काम कर रही है। श्री पटेल कह्यो के जोधपुर जिला मांय 3 लाख बेनामी खातां मांय 115 करोड़ रुपया जमा है।

000

भगवान बिरसा मुंडा री जयंती काल जनजातीय गौरव दिवस रा तौर ऊं मणायी जावेला। ई मौके राज्य मांय न्यारा-न्यारा कार्यक्रम राख्या जावेला। राज्य स्तर रो जळसो डूंगरपुर मांय राख्यो जावेला, जिण मांय मुख्यमंत्री भजनलाल शर्मा ई भाग लेवेला। ई मौके वे जनजाति संस्कृति अर विकास ऊं जुड़ी प्रदर्शनी ने निरखण सागे जनता ने केई सौगातां देवेला। कार्यक्रम के दौरान मुख्यमंत्री समाज कल्याण विभाग री ओर ऊं 40 स्कूटी अर बैटरी ऊं चालण वाळी 23 व्हील चेर बांटेला। मुख्यमंत्री सुखद दाम्पत्य योजना रो फायदो लेवण वाळा दो जणा ने 5-5 लाख रुपया अर अंतर्जातीय विवाह योजना रा एक लाभार्थी ने 10 लाख रुपया री पहली किश्त रा तौर ऊं अढ़ाई लाख रुपया रो चैक संपेला। श्री शर्मा महिला स्वयं सहायता समूहां ने ई 31 करोड़ रुपया रा कर्ज मुहैया करावेला। वां रो न्यारी-न्यारी सरकारी योजनावां रो फायदो लेवण वाळां सागे बातचीत रो ई कार्यक्रम है। जिला कलेक्टर अंकित कुमार सिंह कार्यक्रम री तैयारियां रो जायजो लीनो। वे कह्यो के प्रशासन कार्यक्रम सारू सगळी जरूरी तैयारियां कर रह्यो है। वे बतायो के ई मौके न्यारी-न्यारी प्रदर्शनियां लगायी जावेला।

भगवान बिरसा मुंडा री जयंती रे मौके प्रदेश रा न्यारा-न्यारा जिलां मांय ई कार्यक्रम व्हेला, ज्यां मांय मंत्री, जनता रा नुमाइंदा अर अहलकार भाग लेवेला। जनजाति गौरव वर्ष रा सिलसिला मांय प्रदेश मांय न्यारी-न्यारी ठोड़ां कार्यक्रम राख्या जा रह्या है। आज पाली जिला परिषद् मांय दो दिन री प्रदर्शनी सरू व्ही। काल शहर रा खास गेलां ऊं व्हेती थकी शोभा यात्रा निकाळी जावेला। सलूंबर मांय जिला स्तर री पंच गौरव कबड्डी होड़ राख्यी ज्यी। इण मांय पुरुष अर महिला वर्ग री 24 टीमां रा कोई 400 खिलाड़ी भाग लीनो। सवाईमाधोपुर मांय आज जिला प्रशासन री ओर ऊं सिनेमा घरां मांय जनजातीय तबका ऊं जुड़्या महापुरुषां, स्वतंत्रता सेनानियां अर संतां ऊं जुड़ी फिल्म बतायी ज्यी। झुंझुनूं रा गांधी पार्क मांय सांस्कृतिक कार्यक्रम राख्यी ज्या।

000

राज्यपाल हरिभाऊ बागडे राष्ट्रीय जनजातीय गौरव दिवस री शुभकामनावां दीनी है। वां रा संदेश मांय श्री बागडे कह्यो के ओ दिन जल, जंगल अर जमीं सारू प्रतिबद्ध आदिवासी कल्याण री सीख देवे है। वे सगळां ऊं जनजातीय हलकां री जनता रा भला सारू मिल र काम करण बाबत् कह्यो।

000

देश रा पहला प्रधानमंत्री पंडित जवाहरलाल नेहरू री जयंती आज बाल दिवस रा तौर ऊं मणायी ज्यी। ई मौके प्रदेशभर मांय न्यारा-न्यारा कार्यक्रमां रे जरिये नेहरू जी ने याद करी ज्या। झुंझुनूं मांय जिला कांग्रेस कमेटी री ओर ऊं पुष्पांजलि कार्यक्रम राख्यी ज्यो अर पंडित नेहरू री मूरत माथे सिरधा रा फूल चढाई ज्या। आज ही जिला मांय बाल अधिकार सप्ताह री सरूआत करीजी। इंडाली गांव रा राजकीय महात्मा गांधी अंग्रेजी माध्यम स्कूल मांय ई सप्ताह री सरूआत रे मौके जिला विधिक सेवा

प्राधिकरण री मदद ऊं बच्चां सारु विधिक साक्षरता शिविर ई लगायी ज्यो। सवाईमाधोपुर, पाली अर अजमेर मांय ई न्यारा-न्यारा स्कूल-कॉलेजां मांय खास कार्यक्रम राख्यी ज्या।

000

राष्ट्र गीत "वंदे मातरम्" रा डोढ़ सौ साल पूरा व्हेवण रा सिलसिला मांय प्रदेश मांय चाल रह्या कार्यक्रमं रा तैत आज जैसलमेर मांय वंदे मातरम् गीत गायी ज्यो। भरतपुर मांय केन्द्रीय संचार ब्यूरो री ओर ऊं सरकार री जनता रा भला री योजनावां रा बारा मांय मल्टीमीडिया प्रदर्शनी लगायी ज्यी। ई दौरान न्यारी-न्यारी होड़ां रे मार्फत नौजवानां ने आं योजनावां री जाणकारी दीरीजी। ई दौरान डाक विभाग री बैंकिंग सेक्टर, बचत योजना अर महकमा री न्यारी-न्यारी योजनावां री जाणकारी दीरीजी।

000

प्रधानमंत्री नरेन्द्र मोदी 30 नवम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेला। आ हर महीना प्रसारित कर्या जावण वाळा ई कार्यक्रम री 128वीं कड़ी व्हेला। ई सारु राय 28 नवम्बर ताई मुफ्त नम्बर 1800-11-7800 माथे दी जा सके है। नरेन्द्र मोदी एप अर माय जीओवी ओपन फोरम रे जरिये ई विचार दिया जा सके है।

000